

陸川縣志卷之二十四

藝文類二序  
傳疏  
歌賦  
詩啟

序

南墟地節孝總坊序

清邑陽葆辰  
靈川

國家久道化成無遠弗屆凡窮陬僻壤婦人女子靡不敦飭倫紀崇尚節義甚盛軌也陸邑風俗淳美閨範端莊歷代以節孝著聞者不可殫述比者數十年間苦節幽貞所在多有或以婦代子孝養無虧或以母兼師恩勤備至或撫藐孤而保全宗祀或甘荼苦而備歷艱辛或一門雙節或三世同貞是皆柏舟矢志之死靡他井水盟心波瀾不起者矣顧其子若孫有志未逮

陸川縣志

卷之二十四

藝文類二序

一

久稽上請其何以發潛德之幽光爲巾幗之激勸乎歲癸巳楚雄池籬庭宗師視學粵西以扶植綱常維持世教爲己任使車所至有善必彰無幽不錄而於貞節孝行尤加意焉故按臨鬱郡時陸邑以節孝舉者甚多皆手書四字給之以示獎勵其由學牒縣申州轉詳各大憲題請旌表給銀建坊者三十有八人丙申冬奉旨合建一坊入祀節孝祠誠曠典也夫此三十八人者先後不同時貧富不一致舉前此之有志未逮者一旦共沐皇恩衆擎易舉不數月而綽楔巍然永垂不朽其存者已可以慰苦志於生前已往者亦可以妥貞魂於地下非學憲之微顯闡幽以正人心而端風化曷以及此今學憲往矣陸之人所以

感戴之者宜何如也事成董事呂生崇本請記於邑侯費怡村先生先生以新蒞政公事旁午屬序於予予自慚譎陋何足以表揚淑德第憶甲午夏予以司鐸來陸備文彙報實由予始今又適觀其成得附名於其側亦云幸甚爰誌始末並備列各節孝事實於右俾後之覽者有所觀感而興起焉庶幾化民成俗之一助云爾

洞心堡雙握義渡序

清邑進士李廷樟 榕峯

夫趁斜曛於桃葉煙波著利涉之功譜新月於綠楊雲水紀安瀾之績是以飛梁霞矗垂垂白馬津前綵鷁星流去去黃河曲裏天地之平成非易在昔人有志而竟成江河之利濟方殷藉

陸川縣志

卷之二十四

藝文類二序

二

吾黨同心而共濟陸邑城南四十里有雙握渡者途控博陸流湧高廉際柳岸波搖絕少蘆中之棹值蓼灘露白難尋鏡裏之虹望三千丈之懸流涉波者難憑忠悃創千百年之義渡成功者端賴和衷歲丁酉邑有吳君裕滄徐君步洲與同事諸君建言置渡踴躍捐題衆共斂錢數百緡呈官而杜流弊豎亭而垂遠謀剗木爲舟橫木爲杓春雨桃花之漲行看破軟浪於三篙秋風杜若之洲佇見界寒煙於一碧然浮家泛宅年縻工食且蛋雨梁風歲費增修苟義租不置何以裕用於不匱之源惟恆產無虧乃克藏富於不窮之府於是吳君慨然以督理之任歸諸君而毅然以置產之責爲身任自捐錢數百緡托諸君置買

義渡租二十石使丁男操楫餼足給乎取攜辰角爲梁材足備  
乎修葺施能濟衆晴川流明德之波善與人同煙嶼萃休和之  
象吾知泛慈航於碧水鄉關共沐鴻功攬覺岸於清風奕禩羣  
欽駿烈矣是爲序

灘面河義渡序

李廷樟

陸邑城南六十里有灘面河者雲水蒼茫上聯烏石煙波灑渺  
下瞰清湖西則坡頭村接碧流灩澦照金雞東則灘面墟連銅  
鼓聲靈賽白馬人煙輻輳石骨峻嶒宛龍象之攫拏波滙瞿唐  
峽口恍龜蛇之蟠伏濤迴彭蠡磯頭則有打包客過趁市人歸  
當楓落於吳江涉水者尚可褰裳而濟倘霜橫乎楚岸向若者

陸川縣志

卷之二十四

藝文類二序

三

實深濡軌之憂此際擲杖難登孰則叱黿鼉以作駕投鞭莫渡  
誰能填烏鵲以爲梁余嘗經由水次憑眺中流題柱有懷壯志  
未酬乎司馬浮槎可渡雄心莫問乎牽牛戍戍歲倖捷南宮將  
攬轡而遊澄清之宇綰符東國因望雲而乞問視之私宗叔祖  
炳霍等安瀾念亟利濟情殷剗木爲舟待水漲溪流之用橫木  
爲杓俟風清霜隕之辰鳩工庀材春冬有備鷁租募役昆季同  
心修澤國慈航既光我隴西譜牒廣福田善果望宏茲柱下詒  
謀此時下上輪蹄猶半著風塵之跡他日往來冠蓋定同登雲  
路之梯

鼎建大成試館序

清邑 恩貢 陳文楷 鑑堂

夫大成試館何自昉乎昔特竹林君念切先聖情殷後學於嘉慶二十一年春邀同志二十六人聯爲文社並由諸友捐資遞年儲積生放一爲慶賀孔誕之費一爲裁成子弟之需以及社內之成名出仕者花紅水腳有所從出是一舉而三善備焉乃林君管理十餘載積金已三百兩有奇而厥志未成修文已召矣幸其哲嗣柱峯先生能承父志經營二十餘年蓄貯愈多除每歲慶誕考課之用並置租五十餘石爰謀諸友曰向在紫竹庵課藝惟歷有年第思梵室禪房非植桂培蘭之地也天花貝葉非揚華摘藻之區也惟是土名巡檢乃古司所隸之鄉其地背陰面陽實有向明之象而且山環水繞榜山拱其南天柱鎮

陸川縣志

卷之二十四

藝文類二序

四

其北東有文龍之秀西有泗嶺之奇洵勝境也蓋建試館焉諸友曰唯唯咸豐三年歲次癸丑爰諏吉鳩工約費金五百有餘兩數月而告竣顏曰大成試館蓋爲至聖集羣聖之大成而名之亦爲子弟期學業之大成而誌之也則崇祀先聖與曲成後學基於此矣所望有志之士顧名思義入其戶當知禮門義路之是由也登其堂必求聖域賢關之可造也持躬者尚乎德會友者則以文斯亦足取益於身心矣況又有老師宿儒持金針而造士桃李咸被春風握玉尺以量材菁莪共沾化雨則此日之陶淑而成正欲異時及鋒而試果其丹成九轉定知字值千金將見修於家者獻於廷功名鵲起著於鄉者光於國科第蟬

聯由是而爲國爲民爲朝廷之柱石作忠作孝作陸邑之偉人庶不愧於大成之名也是爲序爰泐名以垂久遠云

### 三板橋節孝總坊序

清邑  
訓導 龍汝楷臨桂

從來婦人以節孝旌者婦表懷清蜀女芳留秦史姑能終養陳氏譽播漢書歷朝以來褒揚載於簡冊者代不之人大抵皆法古先王褒德錄賢與人爲善之遺意也惟我朝聖聖相承德侔天地道統帝王重綱常崇節義以孝治天下化行俗美復時加獎勵故婦人女子咸知以節義爲重孝行爲先如陸邑賢媛前以節烈揚節孝著者指不勝屈邇年來其間青年失偶白水盟心或立後承祧或撫孤繼志或一門四節或兩代同貞堂上竭

陸川縣志

卷之二十四

藝文類二序

五

孝養之誠婦而代子膝下嚴義方之訓母而兼師皆能無負其夫子而節義可風亦孝行足式者同治八年恭逢皇恩下逮採訪節孝巡撫部院蘇遂捐俸設局委鹽法道凌續委按察銜左江道覃前後行文到縣採訪鄰里紳耆現任永安州訓導舉人劉珍祥候選訓導廩貢生龐玉衡州同銜王敷言中書科中書銜甯宗聖監生溫起楨倡率公舉節孝婦呂劉氏等由縣主陶申報總局彙詳巡撫部院題請旌表崇祀建坊同治十二年奉旨依議欽此其節孝後嗣酌與經營既就成議時有同治二年同鄉官戶部主事陸汝黼由京呈舉陸川縣節孝婦一名同治七年同鄉官翰林院編修劉曾由京呈舉陸川縣節孝婦五名

先今行文到縣均准旌表未及建坊入祠其子孫亦來議與同  
建正所謂獨力則難持衆擎庶易舉者也於是合節孝婦二百  
三十二名奉旨同建總坊勒石入祠以垂名萬世享祀千秋誠  
聖天子崇善之曠典也勸善之美意也而天下後世之爲巾幗  
者亦曉然於節義孝行之足貴爲善之榮施矣若夫德能獲福  
善則降祥其節孝後人鄉薦會魁聯登科第文經武緯並著勳  
名遂致寵錫龍章榮增象服況繼起者桃李多將挺之秀璠璣  
有必發之光行看蟄蟄繩繩簪纓不替應卜麟麟炳炳綽楔彌  
輝豈非坤貞順德之食報靡涯哉光緒元年春興工建坊今既  
落成董事監生龐繼昌等囑序於楷竊自慚謏陋空腹難文第  
陸川縣志

卷之二十四

藝文類二序

六

念道屬綱常之大事關風化之原而司鐸陸陽義有不容辭者  
爰誌其始末俾見者快潛德之不湮聞者慕休風而興起云爾  
謹序

重修馬坡墟永善庵序

李慶雲

馬坡居有龍堡之中二十里與鬱林毗連隸於縣屬北境麗水  
出於前獅子江鹿苹江合於後山環水繞回互煙雲比櫛市廛  
稀疏村落墟之西有廟歸然由來舊已都會名區例有專廟茲  
合堡統立諸神招僧供養集衆奉公祈福賽會有足資者乃窮  
鄉僻壤之位置是則然矣第無租賦所出勢不能以久長有黃  
省南毅然與覃有麒同撥租歸廟歷年貯積二十石有奇香火

不絕屢有興修發簿捐題悉表諸石光緒丙戌春余奉朝命隨大臣勦辦越南界務事畢心皇皇如不及順道旋舍一遭路出馬坡時興修永善庵越三年而工竣適與黃筱坡廣文晤請序於余弗敢卻愬然者久之思古之建豐功樹偉業烜赫生前彪炳寰宇以流光於竹素者靡不賴一心之神明以爲主矣何有於廟桂林巖洞各有撥租後來陵替皆變易無遺而是廟獨體其先人敬畏奉承之心以葆守挾持俾勿壞亟宜揚之壽於貞珉永垂不朽求世德者後必昌可預卜焉稿甫脫猶迴憶童試時往來憇息瞻仰神庥今日跋涉宦途山川睽隔幾三十載尚耿耿於心神恍惚也是爲序

陸川縣志

卷之二十四

藝文類二序

七

三板橋新節孝總坊序

清邑訓導 覃季蓮 桂平舉人

聞之有德者言可爲表行可爲坊故期頤而臻上壽者建之坊貞烈而著奇行者建之坊節孝而存苦志者亦建之坊建坊之由大都取其言表行坊意也邇來陸川節孝婦十六人皆出自名門于歸望族其青年守節盡孝或撫孤而成立或擇繼而承桃苦志所存無異昔節婦之髮封臂斷所謂言表行坊者烏有不可耶方今神聖天子以孝治天下恤孤憐寡下詔採訪節孝懿行以備優獎以表芳型光緒十八年經邑人呂葭堂農部稟縣主呂轉詳廣西巡撫部院馬彙奏二十年奉旨恩准崇祀建坊不獨爲今之節婦榮亦足爲後之巾幗勸矣越明年乙未歲

呂王氏嗣君炳勳與諸節婦令嗣商之欲建專坊之煩不若合坊之省於是卜吉鳩工建坊南街北坐南向囑余爲文以誌之余閱諸婦節孝實錄乃嘆其堅心苦志原非虛譽因爲之序其事且爲之作歌曰九原之下夫難忘有翁有姑在高堂教子斷機推孟母節孝之門後必昌珠既沈兮玉又碎何知寵錫有龍章行人指點爲誰氏片石流芳萬古長嗚呼片石流芳萬古長

有真趣齋詩鈔序

清邑舉人馮希京少如

詞工潤色載贊承平詩本性情胥關學養自世俗規撫格調躡駕聲華獺祭之工竄乎文囿驪珠之得愧彼詩豪趣且未知真於何見其有寄丹青於寰宇不費鑪錘滋舞詠於門庭藉之陶

陸川縣志

卷之二十四

藝文類二序

八

寫語典訓則船登多寶論宗旨則鉢付元沙有時夔拊龍言奏鈞天之響有時花歌草舞抒景物之娛莫不指心得師因題結體吾於李君樾生信得其真趣焉今春于役縣邸其猶子百癡袖遺藁見示受而讀之吉光片羽無長慶別裁桂林一枝悉景龍禁體情餘於均戚而意主於獨欣今者笛渡人歸叔夜之音誰嗣竹林遊歇步兵之集未刊其梓而存之可乎百癡唯唯請爲之序伏念樾生乃吾師郁卿農部之哲嗣也累葉承華髻年擷秀看花隨苑玉樹郎君騎鶴揚州神仙子晉才名媿樊川第五丰神推洛下無雙當夫隨侍都門寄居京國隻雞對局叨陪風雅之林匹馬臨邊大得江山之助又況傳家之業踵武夫祖



庭學詩之詔希軌於前哲用能窮高以樹表極富以選言絲竹  
登場繼聲韶濩宮商在口淨洗箏琶其振響也藻耀而高翔其  
希聲也豐融而遠邇洵足蜚英律館掉鞅吟壇使其神劍未埋  
強臺早上進蓬山而揆藻沂康水以論文名士風流重話琴樽  
之樂才人日下繡成橋梓之林豈不紙貴三都玉飛五市而乃  
浮瓜游罷每念元瑜白玉樓成遽凋長吉嗚呼惜哉希京忝附  
師門夙承英盼共傳祖鉢謬許知心猶憶山畫晨張雨窗夜靜  
孤檠對坐高談而鋸屑皆飛丈席追陪一笑而酒杯欲沒茲者  
山阿零落悵才命之升沈竹素叢殘幸文章之未死與編遺集  
爲話生平感春夢之重重傷知交之落落君才似錦休更開僧  
陸川縣志

卷之二十四

藝文類二序傳

九

鉢之蓮我鈍如椎祇解放佛頭之糞舉其所敢知者附之簡端  
留其不能言者俟諸大雅

傳

孝子黎伯寬傳

石志

明邑人

李秀芳

西成

公諱伯寬字仲容號方塘其先江西人也家陸川父諱聰陸川  
歲薦公秉姿敏穎讀書過目成誦母早喪事父每食必侍每出  
必告每反必面昏定晨省歷十餘載率以爲常父或遘疾則憂  
形於色衣不解帶湯藥必親嘗迨至沈疴雖憂苦猶強慰父曰  
無虞竊自呼天號泣求以身代嘗糞甜苦以卜瘥劇有古黔婁  
風君子以爲難焉泊乎父終執喪哀毀骨立逾月卜宅兆而安

厝之築室墓前不問家人產業朝夕進膳如事生儀時攀樹號呼涕淚著樹樹爲之枯牧童樵豎聞之感動歌曰黎孝子黎孝子見親無有期思親何日已其至性動人如此雖禫祥歸家猶餘哀未忘遠近嘖嘖嘆羨弗衰昔人云求忠臣於孝子之門公由明經官浙江西安主簿歷南直吳江縣二尹所至有政聲使公職司大僚當與古名臣爭烈矣而僅以縣丞終可慨也夫雖然古來之膺高爵厚祿赫赫一時者曷可勝數而名卒湮沒不傳請以視公其優劣何如耶丈夫子六長可耕登賢書知安順州次可耘以恩貢歷安定縣尹三先卒四可耔由明經任寶慶府教授五可耨以鄉薦知漢陽縣六可耨以選拔任潯州府教

陸川縣志

卷之二十四

藝文類二傳

十

授公可謂有子矣人以爲孝感所致云

孝子龐希睿傳

石志

明邑 恩貢

李

森

公諱希睿字士哲號月川生而仁孝稍長出就外傅放學歸依依膝下復館遲師責之曰子非逃學者乎曰學以何者爲重師曰以科名爲重曰抑末也所重者孝耳某事親不暇非逃學也識者奇之既而身列黌宮每行一事必告其父母曰某今日所行某事每交一人必告其父母曰某今日所交某人惓惓然必求其父母喜悅而後即安一日者母疾亟倉皇失色求醫藥行不成步幾乎墜於來清橋下日夜侍側衣不解帶母不食己亦不食疾止乃復初俄而遭父喪水漿不入口淚盡繼之以血居

廬守喪三年足不入內室口不茹葷腥止需一老僕侍茶服闋  
檢其寢苦如齏粉生平不治生產家世清白薄田無幾一任季  
弟分子縣令嘉之贈以牛判百紙蓋一紙可得銀五錢歸告母  
曰殺百牛之命以資朝夕可乎悉焚之有捕兵奉上解屯田餉  
銀凡數十兩酒醉失落公拾於道上晚歸不抵家爰宿奎山書  
房次早寫拾帖於城南北門兵來識認還之酬以一半公曰豈  
受謝者速持去兵感激無地公領歲薦無心仕進嘗賦詩有云  
老淚兩行惟母在餘生一日即家居著有周易精義儀禮雜解  
並選錄古詩文約二十卷明季兵燹散失父鼎萬曆辛卯科解  
元子二長鳳裔邑庠生本朝敕封文林郎次鳳歷

陸川縣志

卷之二十四

藝文類二傳

十一

名宦龐穎傳

清刑部  
主事

童其瀾

公諱穎字右魯廣西陸川人自少爲諸生落落有大志順治庚  
子科舉於鄉爲楚嘉魚令禮士愛民興利剔弊二年邑人安其  
政康熙戊辰夏五月武昌裁兵反屠燒縣邑賊害官吏漢黃諸  
郡爲之騷然是時嘉魚兵不滿百城垣傾圮距蒲圻甚近蒲圻  
失守百姓懷慄欲逃公諭以大義爲言利害皆安居如故公與  
把總馬學同心戮力以保危城掘隄埽藏舟楫斷賊之來路又  
以私財犒賞兵役日夜巡緝賊不敢入境然黨附日衆又將爲  
患他邑公因以機畧上提督徐曰賊勢雖銳然倡亂者獨督標  
二千人耳撫標城守均遭迫脅非與之同謀共叛也今賊既聚

精銳於江北則在咸寧者不過市井無賴烏合之衆若大兵迅臨自望風瓦解咸寇既除舟師順流而下武昌一鼓可復也提督以援兵未至難之數日公復上書曰蒲圻腹內之疾也蒲圻不復賊不可滅爲今之計大兵堅壘金口而發偏師以襲蒲出其不意此上策也檄岳州陸路諸兵疾抵蒲境而以大軍臨其後使賊首尾失措此中策也若舟師孤處江上以待援兵曠日持久勞師疲衆使賊日熾而後圖之則非職之所敢知也當是時夏包子部署諸將令僞總兵楊兆先將兵寇岳州兆先虐使其衆人皆怨之於是撫標弁兵沈朝相等密遣人往金口投降書約爲內應公捕得之詰其實若與書辭無異遂親解赴金口

陸川縣志

卷之二十四

藝文類二傳

十二

且言宜示恩信以招徠叛黨提督給以千總劄符並免死牌仍令歸蒲圻甫出境而沈朝相等率衆千餘人縛僞總兵楊兆先及僞知縣江應昇以降而賊遂以不競矣公前後上諸大吏書不可一二數然賊之所以侵尋不制與賊之所以破滅者公皆燭照數計而一一預見之於早也公性至孝令嘉魚二親在粵不能遠迦作亭於堂後題其額曰望雲以誌屺岵之思迨賊平遂辭職歸養不復言仕嘉人至今猶感頌不忘云公孫嶼余同學友也前爲廣東番禺令邑多盜盤踞山海間爲患甚鉅遂請當事願躬往諭之不數月而渠魁接踵授首數十年盜患以息其才畧固有大過人者乾隆九年公季子驥以公令嘉魚時事

請序然後知智勇忠義之風其來有自驥今通判廬州嶼今爲廣東都轉鹽運使皆嘖嘖有聲嗚呼公有大功不得顯而顯於後人也有以夫

運使龐嶼傳

許道基

龐運使嶼字石洲號頗亭先世自化州徙居陸川祖穎父驥並舉鄉薦穎爲嘉魚令值夏包子亂力保孤城楚粵兩祀之嶼沈毅有大志才思俊邁爲諸生已負盛名雍正丙午科以選貢領鄉薦第二人丁未試禮部下第會粵東請吏即承命以往陸川故鄰粵東嶼周知風土而夙裕牧民經濟先後權鎮平歸善二邑事廉能善決獄革歸善商船照費及屯糧溢羨民歌頌之遂

陸川縣志

卷之二十四

藝文類二傳

十三

見重上官調番禺令番禺會城劇邑嶼堅明約東不一月刁健戢輸納平沿海芟沙二司向爲盜藪出入剽掠爲番舶大患盜魁李士雄多羽翼工偵探蹤跡狡橫官捕之十年懸千戶爵賞而卒不獲大吏持勦撫無成算制府孔毓珣顧謂嶼曰此不撲滅終成燎原雖然芟沙生靈可憫也嶼璉曰公念生靈德莫大焉竊謂勦撫非有二亦並用之耳誠假以千兵許便宜當扼要聲勦仍宣德意刻期聽湔洗其孰不畏死倖生俯首就撫者李士雄雖黠羽翼既失擒之一夫力耳勦不已易何憂滋蔓乎因出沿海屯紮圖以獻制府審嶼能辦賊即令馬參將統千兵聽指揮嶼乘夜密布要害及晨芟沙人始知兵臨欲遁無路大驚

聚泣嶼單車馳諭曰所不赦者李士雄一人餘許自新無恐然逾日中不從我者入勦吾不活爾須臾就撫數百人內有積案逋盜二百七十餘人縛送制府附請末減餘悉縱遣之獨士雄先期逸嶼復命曰盜魁雖逸然在掌握中耳乃召已撫者授意使爲計旬日忽十餘輩舁一人至則士雄也且曰士雄多結貧民恐謀奪救故詐爲鬩鬪鳴官狀始得達耳事聞擢廣州府理瑤同知撫定八排瑤加設汛險隘攝韶州府事添礮臺兵杜海寇出沒撫數百人上海防圖題達報可香山諸境以寧賊陳美倫曾合陰結粵東西無賴圖不軌嶼密遣弁至梧潯抵五屯計擒之獲符劄印信時懼株連者衆案定刑止巨魁二人遷廉州

陸川縣志

卷之二十四

藝文類二傳

十四

知府未行調廣州知府善折獄而不事刑威民有前後青天之頌前謂吳隱之也雍正十二年進惠潮嘉兵備道五載連稔賑不待報存活者無算乾隆六年海南大饑以嶼善存附遂移雷瓊道通轉輸平衡石散蜂蟻經理數月食足境安遂遷兩廣都轉鹽運使司運使粵商貧而侈多浮耗逾糧則餉虧繼必追賠不已則商病嶼日籌抑商通引首革餽遺陋規悉以漏計一十三萬金詳歸公一無私焉兩視臬篆一攝糧儲皆以清嚴見稱既以鹽政宜視遠近難易行勾銷之法議格不行遂用獲譴訊無實得請復原官嶼既積勞成疾乞假歸里數年竟不起年五十八子琛瑋並能文琛登丙子賢書通敏有父風嶼之攝糧儲

也使所屬解役自執攬不溢粒米尤禁違例折色未幾後官以折色事敗廷遣大臣往治追覈二十年積弊惟嶼一塵不染天子稱其廉會嶼病甚未及召用云論曰士大夫當官廉靜存心利物賢己利物莫大於濟變夫廉靜自守臨事恆擾不知所爲則一方之害隨之其奚稱守土余觀龐運使之祖當夏逆搆亂以區區嘉魚捍衛全楚誓衆安民有古睢陽之烈運使嗣之至不動聲色而盤錯理其勦撫芟沙雖虞仲升之於朝歌何以加焉蓋以有用之學世其家而非沾沾一節之士也聖人稱片言折獄又曰由也果於從政乎何有諒哉

節婦黃孺人傳

清邑  
恩貢李 崔

陸川縣志

卷之二十四

藝文類一傳

十五

節婦黃氏乃庠生謝公翹先之嘉耦同邑黃公雲標之室女也少幽貞長而賢淑姆訓多在大義不屑屑以女紅教孺人格遵之無少違年十七于歸越六歲甫生一子未及週歲夫遂即世時孺人年僅二十有二耳慟之甚慟而絕絕而復甦者數矣姑因諭之曰人固有時死賢於生亦有時生重於死吾子雖亡汝生即吾子在也且汝瑩瑩孤兒宗祧攸繫撫育者誰勿以小諒害大節因忍哀存生惟是茹苦荼飲寒冰矢志靡他焉當是時家翁已先逝不逮事惟諸姑三人尚存孺人皆敬事之盡得其歡心且生姑李太孺人因連喪二子成疾孺人率其娣侍奉藥餌外一起居必問安一飲食必視膳終始惟一既而姑病愈後

歷年八旬有二說者謂良由孝養所致庶幾近之又慮幼子形單影隻爰抱姪爲兒撫之如己子且教訓維勤常語之曰汝父不幸早世庭訓無人吾子子一身母兼父道必不以姑息陷汝輩無成善教類如此後二子皆善承先志其親生子蜚聲庠序洵有由然已生平性貞淑自喪夫後操益厲閉戶孀居足不履庭朝夕惟侍老姑側時或育子膝前雖外氏家亦罕至云孺人抱子一曰填前本勵志詩書以所志不遂退而耕釣有古風親生子一曰堦入武庠尤爲傑出女三人多適世族孫男八俱事舉業妙年可畏知必有恢前烈者孺人生於康熙四十一年至雍正元年夫亡守節卒之日則乾隆十九年也享年五十有三

陸川縣志

卷之二十四

藝文類二傳

十六

計孀守三十二年當時同苦節者又有其姊李氏焉

節婦李孺人傳

清邑舉人 呂敏敬

節婦李孺人迺邑庠生姻翁謝公效先之良匹也初其父李公茆見孺人貞靜純一雅愛之不輕許字稔翁出自善慶家爰擇爲東牀壻迨孺人于歸後婦道惟謹凡一切工組紉主中饋諸事巾幗女子類能爲之不具論論其大節方昔之賦桃夭也惟期君子偕老爲百年計居無何而翁溘然長逝矣時孺人年祇二十有四而已哭之慟幾欲相從地下誓不獨生然諸姑老矣子亦穉甚長甫三歲次僅數月毛血未燥煢煢在疚誰爲善全者猶憶翁病時預勉之曰吾抱病多不起猝有大故如姑老子



幼何汝幸善事老姑撫弱息以補吾不逮吾死日瞑矣孺人忍  
哀營葬畢遂自矢靡他焉朝夕與孀嫂同卧起共茹荼皓首無  
二以視楚之貞姬衛之共姜何多讓焉不寧惟是常念北堂姑  
氏夫所自出也深恩罔極時敬事之每早必躬親問安先嫡姑  
次生姑次庶姑晨昏視膳亦無間焉姑嘗語人曰吾幸有此二  
婦依依膝下幾忘喪二子也屆朔望節期必率幼子姪輩詣祖  
前肅拜如禮遇家翁及夫等忌辰必潔牲酌以致敬家中事無  
大小必請於嫂而後行事嫂且如此況諸姑乎教子則嚴肅更  
與嫂氏相誥誡凡子若姪一體訓之後各有成立妯娌二人彌  
相得焉孺人生子一曰堂名噪成均一曰塚崇儒術里多重之

陸川縣志

卷之二十四

藝文類二傳

十七

女一孫五人多秀穎異日必有繼家聲而起者孺人生於康熙  
四十三年卒於乾隆二十一年享年五十三計守節三十一年  
翁捐館時則雍正五年也因令嗣輩請傳於余余也誼忝葭莩  
不得以固陋辭爰次其大畧如此以俟後之珥筆者永著其芳  
徽云

羅母吳恭人傳

李慶雲

古者彤史之官掌司典籍紀閨門懿行以上裨麟趾關雎之治  
士君子身不當其責見戚里賢媛有淑德徽音足資巾幗儀型  
者每樂編諸家譜或形爲詠歌以風勵當世如吾姻嫂羅母吳  
太恭人者其子職婦道壺政母儀至足述已恭人爲姻翁仁讓

公季媳翼臣司馬君德配而光祿寺署正世講通洲之賢母也自幼幽貞簡默不苟言笑習女紅惟紡織爲事年十六于歸時祖姑邱太夫人年近九旬難於步履凡出入起居搔抑扶持朝夕不離側事仁讓公潔精滌滲侍奉務得歡心偶沾小疾則醫藥祈禱寢饋俱忘尊姑陳太恭人中年遘疾輾轉牀褥者數年自卧病至不起侍側無倦容其奉繼姑呂恭人尤謹呂常語人曰我歸數十年無幾微聲色忤我者其惟吳媳乎呂嗜檳榔恭人每得佳者必以進觀此一節則平日之竭誠盡敬可知已其色養備致有如此閨門之內相敬如賓婉婉聽從惟禮是守司馬君耽精道味篤嗜經史家人生產事一賴闔內操持用志不陸川縣志

卷之二十四

藝文類二傳

十八

紛遂以文雄於世清同治元年壬戌榮膺鄉薦惜中年鶴別未竟厥志恭人茹蘖持門力支大廈仰事俯育惟思上慰所天無負顧託而後安司馬君同懷兄弟二人司馬素友悌恭人亦事姒猶姑凡冠昏喪祭一聽姒命處分日出而作不肯後日入而息不欲先以及麻縷絲絮分多分寡怡然領受初未常有較長絜短之心分爨之日亦然其能敬且和務尊卑弱之誠有如此人情勤於持家則臧獲恆深其責備儉以自奉則縑粟亦吝推施恭人井臼桑麻親爲操作雖祁寒溽暑宵分不少輟諸子請少間則曰吾非好勞特有福不可享盡耳至待奴婢則甚寬恕從不肯以鞭撻相加且與同甘苦若曰是亦人子也略予體恤

庸何傷處富貴之中所服惟荆釵布裙節嗇飲食而待師宴客則盛饌是陳喜施予貧媪寒嫠有面訴淒涼者錢米衣物欣然與之至再至三無吝色其訓子姪之言曰由儉入奢易由奢入儉難寧人過取我毋我過取人蓋惟儉斯我無過取亦惟儉斯不妨人之過取奢將反是可勿慎歟其調劑內政競綵緩急各協攸宜有如此當所天已喪遺孤五長達文次守文三霖文四晃文五廓文即以母道而兼父道嚴督諸子學業而尤責成長君使之裁成諸弟今皆厚自砥礪次第聯袂雋鬯宮長由隆安縣學博任加秩請四品誥命以慰劬勞孫曾類皆恪遵懿訓德業交修望而知爲佐時令器也鍾愛猶子素庵中翰曰吾姆產業交修望而知爲佐時令器也鍾愛猶子素庵中翰曰吾姆產

陸川縣志

卷之二十四

藝文類二傳

十九

多不育一方受室而天所存僅茲一線耳願天地祖宗默佑成立襁褓中即保養教誨殆過所生焉遇孀守姪媳尤厚每有分物必格外多與曰待孀應如是也孀無嗣取素庵長子嗣之朝夕撫摩鞠育則無異己孫其母教賢明愛勞兼至不以人己之間稍存歧視有如此茲四德者一皆本諸天性之最真發乎人情之至正以故坤儀日懋無疾言無遽色犯而不校讓而不爭姻婭妯娌間翕然和睦光緒十九年恭人七十有三是年十一月二十五日不祿鄉人追慕之故以仁孝諡足見恭人之德殊足繫人思矣予伯兄與司馬苔岑誼洽慕其家仁厚申之以婚姻兄之長女恭人季媳也愛日中閨備沐聖善之化予實知之

最稔故爲之立傳以勸後世亦聊以告惇史云爾

疏

募改置社壇疏

呂錫蕃

記曰大夫以下成羣立社曰置社註云居滿百家則得立社春秋昭公二十五年齊侯請置千社杜元凱謂二十五家爲社士庶之有社由來舊已詳稽其制壇則北向不屋表則各樹其土之所宜木主則以石爲之祭社之典先王一歲三舉其有大災大故則不時類之宜之下雖與上不盡同而春祈秋報以馴致於家給人足享平康而無天札災厲者胥于是乎在社顧不重歟洞心之社不知立於何時其先固在伏波廟旁鄉之人執雞陸川縣志

卷之二十四 藝文類二傳疏 二十

豚駿奔走天庥滋至焉嗣以廟隘欲廣之而礙於社並進之廟中以奉其祀嗚呼此吾鄉之所以剝落摧殘以至今日也亡國之社屋之示誠也古之制也吾鄉將使之勃然興以爲他鄉示勸乎抑將使之忽然亡以爲他鄉示誠乎是大惑已改置之議聞前既有之而其間意見各殊有謂多歷年所神所樂棲改之必遭奇禍夫社貴通陽屋之則陽不通今以不通陽爲樂通陽爲不樂爲神之性也誰其信之於是糾合衆議布告同鄉伏乞爭相傾囊明正典禮來春擇吉築壇請神即位廟前舊有榕樹一株雖久經枯落再爲移栽以答陰幽固自易易幸勿拘牽世俗吝出兼金以失百世樂利之休是所厚望焉

募修大橋三恩寺重塑神佛像疏

馮希京

八萬四千手眼聿開定慧之天四百八十樓臺舊闢莊嚴之界  
是知場修卓錫補有漏因自必園啟布金結無遮會顧使西風  
佛地樓墜殘鴉冷雨神祠門遮破葉可乎三恩寺縣南大橋墟  
一古刹也西竺門空東林跡舊香火結往來之社鑪煙騰交易  
之場覺路臨衢金繩永闕迷津到岸寶筏同登固已林建栴檀  
緣深香火矣然而靈光日久祇樹春銷金碧飄零未稱華嚴富  
貴招提蕭索空餘水月清虛叩迦葉之門未堪小住敲衆香之  
鉢準擬大修特念爲浮屠者必合其尖寫大乘者難滿其欠恭  
疏小引遍告諸方伏願大宰官身諸善男子即解脫法證功德  
陸川縣志

卷之二十四

藝文類二疏啟

二十一

緣開方便門種菩提果當仁不讓麤載而來有志竟成鳩工斯  
辦十柯九匠儘教方丈光明埜繡鑄金合令如來歡喜行見毫  
飛寶相指見琳宮化金粟之身靈超八解灑珠林之雨澤濟羣  
生此時繫社斂錢降筆比傳燈之錄刻日籠紗題壁芳名勒千  
佛之經

啟

募修陸川正學署啟

呂錫蕃

吾陸邑正學署昔曾構造用肅堂階今歷歲時不蔽風雨剝蝕  
漫漶湫隘囂塵擇地而蹈竟爲窪地循牆而走幾等巖牆笑廣  
廈之萬間自他有耀坐春風之一月遽爾相忘縱問字車來遊

緇林而可憇而執經人至懸絳帳而安施此重有待於經營當及時而修葺也然師儒講學羶素稱寒苜蓿傳餐官常號冷如欲鳩工而興土木必集狐腋而備棟梁普告同人共勸美舉倘使室成輪奐吾道與有光輝從此志切仰鑽瓣香如何禱祝

募助純陽帝君財帛星君香油啟

呂錫蕃

吾邑城工之竣敬塑純陽帝君財帛星君寶像鎮南北二門阜解愠之財功齊虞舜橫朗吟之劍迹媿岳陽資道術以牖民廣貨泉而濟世神靈有赫供養宜隆特是宵柝初傳誰爇金貌之篆晨鐘甫動慣消寶鴨之煙知負郭之乏田難借花而獻佛用是倡茲義舉結此善緣伏望擲米成山同心人聞呼即至將錢陸川縣志

卷之二十四

藝文類二啟

二十二

繫社阿堵物不招自來庶幾耿耿一燈永獲慈雲之庇綿綿百世長仰法雨之施

增修翰洞墟靈佑宮啟

清邑附生李祖蔭樾生

竊維寒燠雨暘協休徵於皇極聰明正直翊景運於神靈羣生蒙樂利之庥禮隆禋祀比戶慶明昭之應儀肅趨蹌是知廟貌之常尊式象帡幪之罔外匪今伊始振古如斯惟翰洞之里閭實龍濠之閩奧人情和會境連兩邑之衝地脈鍾靈貨聚五都之市粵稽靈佑宮者創自先民葺於近代崇祀天后聖母娘娘雷霆元帥康公尊神暨地主聖像自昔心香甫熱靈爽式憑汲古觀光則鴻毛遇順課晴問雨則魚夢占豐惠商旅而利濟無

疆捍災患而氛祲不作久已聲靈赫濯感應昭垂矣然而數弓  
蘭室塵囂未愜乎人心十笏草堂湫隘詎宜於神道爰咨耆老  
僉議興修因此地基增其式廓購牆陰之麋峻將駟木以架楹  
闢後囿之鹿場待誅茅而結屋非必青瑣丹墀壯麗上規夫貝  
關庶幾芝房松牖幽深足駐乎雲駢嚴對越於在天期駿奔之  
有地夙懷宏願未易庀工彼夫漢觀祈仙梁曾飛夫白玉祇園  
奉佛地亦布以黃金矧功德之在人近徵耳目且威靈之濟世  
遐邇寰區顧令鼓臘吹豳猶塵霾夫法座春祈秋報尚跼蹐於  
靈旂乎伏祈香火芳鄰枌榆碩德人捐拱璧室饋兼金許元度  
之家珍聿修崇化苟侍中之里第概建光明將見揮匠石之斤

陸川縣志

卷之二十四

藝文類二啟引

二十三

雷頤肅立引工倕之削欄翼飛騫棟已構乎連雲門何嫌於近  
市金城永鎮千秋銘保障之功玉燭均調萬井享綏豐之福  
引

課讀圖引

清邑 歲貢 呂崇木 薊村

爾材不長爾貌不颺何須顧公筆法良憑斐几坐鱣堂侍兒个  
个趨庭下手裏同拈一卷黃黃卷數來千萬卷四子六經誨之  
忙濃薰左史與班馬豔摘諸家助采章惜哉爾曹殊靈蠢學問  
區別鈍與敏敏若騏驥策崎嶇鈍如款段驅雲衢君不見賢豪  
磊落惟博雅寡陋迂疏終是愚靈臺狀出貽孫子無盡燈然慰  
老夫

歌

卜夫人守城歌 並序

清鬱林州牧 商 盤 寶意

前明陸川令張子翼夫人卜氏值其外赴省邑中寇起倉卒卜氏親督鄉勇守禦經時食盡城陷以身殉難藁葬於萬丈坡蔓草殘碑芳蹟湮沒去冬西蜀石明府來攝邑符請於當軸慨然建亭而俎豆之盛舉也千里寓書徵詩於僕遂賦此詹詹小言何足闡揚幽隱聊答明府慇懃而已

昔聞蘄王禦金師梁氏臨陣擊鼓鼙又聞周師鎮寧武劉氏登垣率婦女兩娥氣概何堂堂誰與繼者垂芬芳妻佐其夫臣報主能將隻手扶綱常陸陽勝國遭兵燹蟻擁蜂屯知不免赴省

陸川縣志

卷之二十四

藝文類二歌

二十四

難邀縣令歸守陴悉聽夫人遣黑雲四合城欲傾孤軍力盡無援兵受圍既失揚旗勢投閣俄聞碎玉聲烈婦捐生羣賊去夫人錦繖隨朝露鬱鬱深深萬丈坡云是當年埋骨處忠軀義氣感風雷一代朱顏事可哀蛾眉偉略有如此肩蟒腰犀真愧哉賢侯弔古褒奇節俎豆馨香永無絕貞魂毅魄招不還杜鵑滴盡斑斑血

卜夫人守城歌 並序

清邑令 劉思誠 純夫湘潭

卜夫人爲明季陸川令張君子翼之夫人也時張君赴省流寇圍城夫人率壯丁狼目百計禦之迨援絕食絕力不能支乃墮樓而死一時守陴兵目亦無降賊者豈非夫人之大義克明忠



貞節烈有以感召之乎洵巾幗完人古今僅見者余攝篆斯土仰厥芳徽爰葺其墓亭爲長歌以紀之時乾隆二十六年

冰署危樓拔地起湘簾不捲東風裏公平賢宰坐焚香靜好琴聲助彼美王事勞人事遠征妖氛四野薄孤城指揮不藉將軍力擔守惟聞娘子兵賊勢披狂援不至析骸易子無攜貳夫人此際篤忠貞義勇真能感異類潰圍不見一人降曰狼曰獐死堂堂短兵須臾猶巷戰何啻當年破睢陽夫人勢迫上危樓極目烽煙接素秋遠望空悲天咫尺淚枯皆裂瞠雙眸兵戈洶湧聲漸高成仁取義豈鴻毛賊逞狂風一何猛罵賊嚙舌舌如刀墜樓一死重千鈞丹心碧血愧人臣鬢眉巾幗空顏汗望風稽陸川縣志

卷之二十四

藝文類二歌賦

二十五

首安足論夫人此心猶未已恨不完城報天子臣忠婦烈一身兼遑計芳名播青史天留貞骨風塵後萬丈坡前秋復春蔓草荒煙斷碣石生氣化作古松筠我來憑弔溯遺跡高低四面青芙蓉勝國河山餘片土千秋一坏馬鬣封百尺城高雉堞新樓臺故址點青燐東山夜夜多情月曾照樓頭節義人

賦

貞烈卜夫人墓賦

並序

清邑舉人龐

琛

至山

邑侯石公下車之始延宿碩之儒召博雅之士訪山川之勝採忠孝之遺客有以卜夫人對者石公欣然偕謁瞻拜之餘隱見碑間宛然有文匪苔匪蘚燦如著色竹二株龍種斑剝湘淚瑩

凝其端蒼松偃蹇勢若天降參差披拂光采耀日石公嘆曰嗟乎夫人以婦節兼臣道貞烈之氣上貫日星物既應之天亦感焉命予爲之賦予曰琛孤陋寡聞未足彰夫人之烈惟使君命不敢辭敬以得之傳聞者而摭陳之爰濡筆操觚再拜而爲之賦曰

維瓊南之特峙實中華之奇甸接方壺之靈長作神州之後殿繫地紀兮巨鰲之首支天維兮五指之巔祝融秉令朱明司天元氣輪圍哲人生焉爰有邱海羽翼上國探禹書佐皇極批逆鱗敢陳力迴狂瀾於東倒挽白日之西匿志士氣壯王臣生色何其盛也粵稽夫人實鍾其地際其時英姿雅度粉黛鬢眉巾

陸川縣志

卷之二十四

藝文類二賦

二十六

幘不能抑其氣閨闈不能掩其奇惟茲淑女作配於張偉哉張侯受命陸陽琴揚民歡歌樂未央爾乃喜捧校士之檄星聚衡文之場嘆王事之賢勞乃馳驅而不遑尉佐逍遙於無事夫人雅鎮以禮防野無戒備歲觸攬槍何期絃歌之地變化戎馬之鄉羅紅巾兮猖狂馳白羽兮告急雷動風旋霞散霧翕常山成重圍合殺氣盈雉堞呼聲震繡閣夫人乃撤簾箔步前除踐文履曳錦襦聽珮聲之從容感霧縠之紆徐姬妾爲從保傅先驅竦鶴立而未安凝秋眸而踟躕覩萑苻之蜂起胸成竹而神舒虞孤城之不競懼虐及夫無辜倏然震怒忽焉改容蛾眉倒豎俠氣橫空解環佩而衣甲胄離香閨而賦即戎攘皓臂以揮戈

約纖腰而關弓竦輕軀於馬上揚玉貌於軍中昂若騫鴻矯若游龍先士卒而登城決死戰以揚幟傭豎鼓勇疲殘誓死揮淚奮呼拔刀砍地舉戈指賊虎兕喪氣風颯颯而霜凜聲轟轟而電駛羣盜辟易莫敢仰視既而城薄力微爲敵所窺揭竿之勢復熾羅雀之炊無資守衛雖嚴軍威霍靡五雉一兵十雉一矢汲者負尸飢者易子恨賀蘭之不援無南八之斷指若乃闢門不假衆力城隍圯若山頽釀成破竹之勢迫同覆巢之危於是棄長兵接短刃摩肩巷戰瞋目衝陣漂血濺羅襪流矢集雲鬢力疲兮歸冰署勢逼兮登危樓賁育至此氣喪良平當之失籌指天嚙賊慷慨就義罵斷常山之舌怒裂睢陽之背寧甘鐵鉉

陸川縣志

卷之二十四

藝文類二賦詩

二十七

之鑊猶恥開封之臂標名節兮璧完墜層雲兮玉碎乃楊業之公忠豈綠珠之私誓浩浩乎披髮而對帝后跣足而入星辰碧血飛雲閣貞骸表古今

詩

詠揚州蕃釐觀瓊花

明邑舉人 陳以仁

清標獨立古名邦天下無花不服降仙苑靈根能有幾人間麗質信無雙侍香玉女擎珠蕊獻舞飛瓊捧翠幢自有東風能管領道人高卧白雲窗

伏波祠

石志

明邑舉人 黎可耕

伏波祠控伏波灘尚有殘碑漢篆丹嶺右山河歸版籍交南父

老見衣冠青葱樹色天涯路淡蕩煙光海外蠻千古功高在銅柱不妨薏苡與人看

馬山

龐穎

龍種由來產渥洼如何托足在荒遐英姿自是空塵足逸氣還疑飲露華青藹望來葱作色白雲飛過玉爲花梳風洗雨年年好長伴房星壯帝家

望夫山

龐穎

巖際儼然一女流經年經月望行舟煙雲漠漠隨波杳汀草淒淒觸緒幽半鬢侵霜長不改雙眸帶雨獨含愁寄語江上往來客莫漫離鄉作浪遊

陸川縣志

卷之二十四

藝文類二詩

二十八

送莊廣文歸興安

龐穎

絳帳十年川上開一溪桃李問誰栽流風應念胡瑗澤詞賦還推宋玉才此日交歡遺縞帶他時相憶折江梅人情聚首渾閒事說到別離腸幾迴

長沙江上見戰壘

龐穎

當年烽火急衡陽南楚提封半戰場幾堞危樓棲燕雀四圍峻壘駐龍驤洞庭夜靜旄星落嶽麓峯高殺氣藏過客不須愁往事邇來漁鼓滿瀟湘

金陵懷古

龐穎

長江天塹帶淮徐百二秦關恐不如虎踞靈邱誰氏蹟龍蟠大

陸舊皇居川原慘淡孤陵外風土繁華六代餘人事遞遷方物  
在祇堪載酒問鱸魚

龍化江故城懷古

石志

清邑歲貢謝天植

故堞荒煙亂綠苔兩溪流水繞城隈峯頭薄霧藏文豹谷口輕  
風盪劫灰碑石卧殘新牧地鷓鴣啼冷舊歌臺當年龍化歸何  
處芳蹟而今安在哉

觀漲

謝天植

盈虛無定數春水一朝生茅屋連雲溼漁罾入夜橫濤飛山石  
動煙亂野烏鳴拄杖江邊立滔滔逝者情

聞李作霖消息即事

謝天植

陸川縣志

卷之二十四

藝文類二詩

二十九

是非顛倒恨難伸不死猶堪看後人奇禍縱橫惟自受常情冷  
煖莫相嗔水經千折方歸海花歷三秋尚有春野老香聲悲未  
息重逢還與說孤臣

感懷

謝天植

若謂天地小適與雙眼俱若謂天地大無以寄吾軀海上三神  
山聞多仙人居中有安期生碧瞳綠玉鬢一朝騎白雲長揖造  
吾廬衣我赤松錦遺我丹霞珠括囊授祕訣惟以淡爲徒浮名  
何足珍春草秋凋枯犧牛披文繡頃刻無完膚所以古達人輕  
舟歸五湖

閒咏

謝天植

出門日日見青山青山不改舊時顏我問青山何日老青山笑我幾時間

題鳴石

石志

李昌祚

山腰留巨石媧氏補天餘微叩元音發悠然悟太初

呂陳氏暨媳李氏雙節孝坊

在今南關

清廣西

鄂 呂

姑媳生成百鍊鋼天將荼蘼試冰霜未亡共砥心如石已瞑猶含血滿眶五夜孤燈熊荻苦一門雙節姓名芳既邀聖世旌揚典封誥還看紫與黃

前題

清山西

陳宏謀臨桂

姑媳矢三從靡他樹女宗淚盈青草地坊建紫泥封今古希同

陸川縣志

卷之二十四

藝文類二詩

三十

志庭幃孰比踪喜看鸞鳳侶榮顯復重重

前題

清廣西

陸紹琦

冰霜不改千尺松子婦寡鵠孫雕龍人傳苦節有家德天賜大年爲女宗聖代方將闡幽隱遐荒得此宜褒封輜軒博採吾所職握筆首錄風之廊

前題

清廣西

秦新甘

嶺南古荒服聲教時阻遏聖代風氣開文物中土埒我皇御宇初旌門詔首列遂令萬里遙幽芳得上徹吾輩棉質材無以贊聖哲奉命撫此邦制章事振刷日午部牒來展讀清風發牒陳臚姓氏恩光到邊末就中呂家婦雙節更奇絕卅年厄運重一

門正氣結之死矢靡他兩心石與鐵之死矢靡忒兩身冰與雪  
在地爲江漢在天爲星月竹柏遜蒼勁蘭桂輸芳潔畫者歐之  
荻截者陶之髮夜雨泣燈寒年光悲電掣老姑百鍊鋼皓首無  
玷缺阿婦丹臺姿中年早解脫存者已遲暮逝者漸澌滅而今  
表宅里芳名走百越百越土俗殊轉移憂政拙礪世而磨鈍功  
不在唇舌憑高一振響風教無衰歇用是作詩歌士子好傳說  
庚申季秋送澄海張令歸里  
龐嶼

楫十年辜負故園情

陸川縣志

卷之二十四

藝文類二詩

三十一

杭州

龐嶼

萬里孤踪又越遊放懷何事獨凝眸五湖煙水隨舟去南渡君  
臣到海休坏土有苔皆化血長堤無柳不牽愁興亡彈指斜陽  
裏靈隱鐘聲到客舟

秋日重登閱江樓

龐嶼

端州太守舊樓臺遠靄疏煙望裏開一峽當門關不往千帆盡  
日送將來江山有命終留跡詞賦無靈豈見才幾度登臨成往  
事西風木葉落城隈

水仙花

龐嶼

誰將薄質近芳筵只合沙邊與水邊異種一朝移海國前身三

世葬花田鉛華洗盡方成素冷淡生來亦愛緣其柰東風催嫁  
早不教梅萼占春先

走馬燈

龐嶼

一點機關火力強梁間屏上任飛揚過來鐵甲三千隊轉出金  
釵十二行獨對清樽看到厭不知竟夜爲誰忙幾番欲踐尋春  
約蠟燭心長路亦長

魚燈

龐嶼

疏疏點點隔煙霞半近江村半近沙忽奪星光分水色不禁風  
力亂蘆花驚將白鷺時過浦照盡孤舟未到家海日纔收殘夜  
裏數聲欸乃在天涯

陸川縣志

卷之二十四

藝文類二詩

三十二

初秋夜倪省三索飲

龐嶼

官衙無賴對新涼移榻烹茶話轉長豈是主人難醉客卻因世  
事不容狂共餐龍眼清如水自說烏頭愁見霜一種情懷如可  
遣爲君酬唱夜添香

閱江樓晚望七星巖

龐嶼

愛殺青螺幾點尖開窗笑指酒家帘天邊去鳥沈雙影谷口歸  
雲見一簾野水光搖孤樹動秋山色向夕陽添客懷百丈樓千  
尺望落星河厭未厭

端州石

龐嶼

一握清風可入懷唐坑得似宋坑佳即今銅雀無多瓦不及端



州石滿街

過羚羊峽

龐嶼

征帆日掛未曾閒  
峽入羚羊似度關  
一水白盈秋夜裏  
兩崖青出彩雲間  
泉多落樹疏成雨  
月不終宵半在山  
記得端州人賣石  
停橈猶自問江灣

赴潮州官署謁韓昌黎祠

龐嶼

鱷魚潭上問遺事  
指點山川記得無  
十五國中皆奉佛  
八千里外始尊儒  
窮通有道非關命  
遊戲無心任化珠  
我亦因緣來此地  
殷勤稽首禮浮屠

卸雩都縣任留別

清邑舉人李宏壙

陸川縣志

卷之二十四

藝文類二詩

三十三

馬足微官枉絆羈  
迂疏豈與世相宜  
自嫌政少絃歌化  
還喜囊空父老知  
兩載風光銷案牘  
半生嘯植負皋夔  
莫言修竹非棠樹  
猶望將來好護持

飄零宦跡總蕭然  
從此抽簪淡俗緣  
徑裏松陰餘舊澤  
庭中萱草憶高年  
並無妻子成三口  
只有琴書共一船  
歸去何須嗟冷落  
承歡勝讀蓼莪篇

霜風吹折謝家蘭  
觸緒傷懷興已殘  
萬里鄉雲勞夢想  
一灣秋月逼人寒  
帶牛佩犢愁無術  
漱石枕流強自寬  
檢點歸裝添藥裹  
別時有淚不輕彈

爲官未了卻思歸  
退食頻驚減帶圍  
楊柳枝多人半似  
芙蓉花

發事全非虛堂懸鏡談何易南畝鋤雲或庶幾揮手雩陽如放  
鶴恩光猶染舊朝衣

勸農即事

石崇先

沿溪一帶盡農家水有良苗陸有瓜茅舍編籬修竹補青山作  
障綠雲遮平疇翠疊千層浪原野聲聞兩部蛙耕鑿由來忘帝  
力無勞攜酒問桑麻

貞烈卜夫人墓

石崇先

雲暗前坡淡夕陽寒凝枯塚烈秋霜兵鋒斂作山河骨血淚分  
飄草木香爾曰守陴人盡哭千年立傳筆生光一坏黃土今何  
恨獨立城南古道旁

陸川縣志

卷之二十四

藝文類二詩

三十四

俠概崢嶸五嶺奇閨闈正氣感鬢眉高涼城上朝封號金谷樓  
頭客賦詩斷碣新添松竹影貞柯果是雪霜姿蒿蓬三尺埋餘  
恨劍嘯空山夜雨時

前題

清鬱林  
州牧

俞成臨安

夫人矢志在城存烽火何當逼縣門陣裏旌旗朝變色樓頭風  
雨夜招魂夕陽荒塚淒涼影古道殘碑斷續痕一死甚輕名節  
重我來憑弔哭黃昏

一方騷動勢駸駸援絕城孤力不禁當日守陴原草草可憐埋  
玉已深深丁男帶甲無生氣婢女從軍有死心試向坡前尋異  
跡尚餘松竹在碑陰

前題

許道基

萬丈坡高去天尺一縷寒光出坡脊訴天天泣回悲風散作霞  
丹沈血碧吁嗟妻道臣道同可憐婦烈似臣忠三年寒宦勞於  
役一日孤城代有終何處妖氛突封豕烽入重閨拔劍起登陴  
灑淚集遺民墜閣留骸待夫子瓊海茫茫渺故園聊憑螺髻駐  
魚軒靈旗莫颭千秋恨星落軍前五丈原

前題

清邑舉人謝開先

報夫矢一死節烈至今存黃土空銷骨青山不葬魂碑留人識  
墓世遠草封塾勒石惟賢宰褒幽慰九原

前題

龐琛

陸川縣志

卷之二十四

藝文類二詩

三十五

流賊猖狂日夫人義薄雲孤城臨萬騎一節當三軍無地堪容  
妾有天可對君至今留碧血烈氣掃妖氛

前題

清邑恩貢李崔宏瞻

紅巾四突角聲愁急難誰知握上籌夫壻既無馮寶騎妾身還  
有綠珠樓能將婦節成臣節不爲身謀破賊謀若問當年貞烈  
事碑間松竹照清秋

伏波祠懷古

劉思誠

森森桐柏鎖寒煙漢將靈祠水石邊八桂風雲悲薏苡五溪淫  
霧墮飛鳶功標銅柱誠何愧名顯雲臺更可傳千載精魂應慰  
藉只今遺廟滿南天

羅母蕭孺人節孝坊 五古

呂錫蕃

弱冠弄柔翰傾蓋遇羅子  
羅子式金玉苦學殊未已  
我言何自苦彼曰爲母耳  
憶昔家中落靈椿倏然萎  
荆花秀兩枝夢寂池塘裏  
哀哉立煢煢問年甫毀齒  
上有白髮人衰頹偃牀第  
何以濟艱難冰操仗母氏  
輕塵弱草棲波瀾井不起  
中夜斷機絲平明捧盤匱  
謂婦不任外叔兮代經紀  
和乃家之肥祥光洽娣姒  
陰德常耳鳴敬恭桑與梓  
廿載荆布餘女流羣仰止  
自愧未成名餅罄益壘恥  
我聞增感傷清風來窗几  
節義世所有如母誠難企  
劉范發幽潛代遠莫及此  
天子重旌門宜陳採風使  
未幾泮水香高堂顏色喜  
因是達宸聰絲綸下天咫  
坊表於萬年徽陸川縣志

卷之二十四 藝文類二詩

二十六

音播遠邇我忝蘭石交  
蒹葭玉樹倚鬱鬱蒼松姿  
作詩自隗始

前題 五古

清邑舉人 羅循恭

家有遐山子儒林咸相器  
道渠作秀才早既具大志  
我常共筆硯功名互深冀  
渠乃廢書歎泣下數行淚  
謂昔兩大人泮水欣連騎  
兄弟而友朋道義切劇至  
子今讀父書椿庭日趨侍  
我乃命不猶六歲嚴君棄  
母氏矢柏舟哀顛形憔悴  
煢煢挈兩孤三命相依賴  
未堪家多難雁行失予季  
矢死亦久矣從一心不二  
高堂悲白髮安危一身寄  
飲血奉盤匱色養誠兼備  
教子斷機絲程門重師誼  
親賢遠小人出必周行示  
縞衣而綦巾桑麻任勞勩  
徐鄭忘貧富閨門稱少娣  
孤寒憫比鄰粟帛頻餽遺  
茹蘖

卅餘霜起居叨天庇顯揚愧未能念此予心碎今幸荷天庥丹  
詔旌里第願子贈瑤篇鐫石垂不敝非求一字褒聊當苦節記  
我思古女宗浩然有正氣常蘊爲孝慈變發爲節義如母立坤  
維正氣塞天地潛德有幽光小子夙心佩清風動筆花作詩敘  
終始董狐俟千秋大書青史內